

Dutis lis panzis plenis cuintri l'ordenament regjonâl

O vin dit e tornât a dí un grum di voltis che l'ordenament regjonâl stabilît te Cjarte Costituzionâl al è juste une buzarade, une cjastronade che, impì di risolti lis cuistions, lis imberdearâ di plui, cence tocjâ nancje cu la ponte di un dêt la madrachesse burocratiche.

Ma cumò, a viodi cun ce grinte che tòrnin a sbilfâ, ducj in cunvigne, liberai, monarchics, fassisc', e int massepassude di ogni sete, cuintri l'atuazion di chel disgraziât articul de Costituzion, nus ven il scrupul che alc di bon al puedi puartâ. Si tratarâ di cagneris, ma se almancul un fregul di risultât, un pôc di rispîr, un sgrisul di benefizi nol fos in viste, no si sintarès cun tant bordel a sunâ lis trombetis dal Risorgiment, e i tambûrs de sacratissime unitât: co si dismôf chê musiche lì, al è di zurà che a qualchidun j dûl il tacuìn, o che j trime la mangjatorie.

E alore cui sa che no si vebi, salacôr, di ricròdisi, sul cont di cheste "pape di lìn"?...

Patrie dal Friûl, n. 5, 1/15 di Marz 1950